



JUMLAH PENGACIHAN
4.25
sen seunit

EHSAN
0.75
sen seunit

Untuk 30,000 unit pertama
sempena ulang tahun
ASB ke-30



Zeti bersama Ahmad Zulqarnain ketika mengumumkan pengagihan pendapatan ASB secara maya di Kuala Lumpur, semalam.

(Foto ihsan PNB)

Dividen ASB 4.25 sen, agihan ehsan 0.75 sen

Strategi kepelbagaian portfolio terus catat kemajuan

Oleh Mohd Zaky Zainuddin
zaky@bh.com.my

Kuala Lumpur: Amanah Saham Nasional Bhd (ASNB) mengumumkan pembayaran 5.00 sen seunit kepada pemegang unit Amanah Saham Bumiputera (ASB) bagi tahun kewangan berakhir 31 Disember 2020.

Ia membabitkan pengagihan pendapatan 4.25 sen seunit dan juga pengagihan ehsan 0.75 sen seunit bagi 30,000 unit pertama

yang dipegang oleh pemegang unit ASB sempena ulang tahun ke-30 dana amanah itu.

Syarikat pengurusan unit amanah milik penuh Permodalan Nasional Bhd (PNB) itu berkata, ia membabitkan jumlah pembayaran pengagihan pendapatan sebanyak RM7.6 bilion kepada 10.2 juta pemegang unit dengan pelaburan berjumlah 173.2 bilion unit.

Pengerusi Kumpulan PNB, Tan Sri Dr Zeti Aziz, berkata pengagihan pendapatan ASB kekal kompetitif meskipun berdepan cabaran ekonomi akibat COVID-19.

“Bagi pemegang lebih 30,000 unit, mereka juga menerima manfaat pengagihan ehsan ini sebagai tanda penghargaan kami kepada pemegang unit

ASB yang terus setia bersama kami sepanjang 30 tahun dana ini diperkenalkan.

“Pembayaran pengagihan pendapatan dan bonus terkumpul dana ASB sepanjang 30 tahun, sejak mula diperkenalkan pada 1990, adalah sebanyak RM159.6 bilion,” katanya ketika mengumumkan pengagihan pendapatan ASB secara maya, semalam.

Yang turut hadir, Presiden dan Ketua Pegawai Eksekutif Kumpulan PNB, Ahmad Zulqarnain Onn.

Mengulas lanjut, Zeti berkata, prestasi ASB kekal kompetitif berbanding instrumen pelaburan berisiko rendah yang lain dan dana itu terus menjadi pilihan tepat bagi individu yang mempunyai profil risiko rendah

dan melabur untuk jangka panjang.

Katanya, strategi kepelbagaian portfolio ASB terus mencatatkan kemajuan tahun ini, dengan peningkatan pendedahan kepada ekuiti antarabangsa, ekuiti persendirian, hartanah dan pendapatan tetap.

“Pelaburan dalam aset antarabangsa meningkat kepada 5.9 peratus berbanding 3.6 peratus pada 2019.

“Dalam suasana turun naik pasaran global, strategi ini sudah mula membuahkan hasil yang positif, dengan bahagian sumbangan pendapatan kasar dari ekuiti awam antarabangsa meningkat dari 6.3 peratus pada 2019 kepada 24.2 peratus pada 2020,” katanya.